

佛說菩薩念佛三昧經卷第二

弔六

劉宋天竺沙門功德直共玄暢譯

神通品第三

爾時長老舍利弗長老目犍連長老阿難諸  
天魔梵及阿脩羅沙門婆羅門閻浮提人咸

弔六

生是念今日如來應正徧知以何因緣於大  
衆中直說念佛三昧名字不爲一切廣演分  
別便從座起而入靜室時不空見心自念言  
諸天魔梵悉已集會世尊今者右脅而卧我  
當微現神通變化示神通已種種讚歎宣揚

如來大悲功德當如其相攝心入定以是定  
力變此三千大千世界地平如掌皆作衆寶  
微妙雜色復列八道七寶諸樹金多羅樹銀  
葉華果銀多羅樹瑠璃華果餘寶莊嚴亦復  
如此一切佛刹懸繒幡蓋妙幢寶鬘種種綺  
飾優鉢羅華鉢頭摩華拘物頭華分陀利華  
如是諸華布一切處時不空見即如所念現  
大神通乃至三千大千世界令諸衆生天龍  
夜叉乾闥婆阿脩羅緊那羅摩睺羅伽人非  
人等皆坐衆寶蓮華之上華葉無數色香具

足各相知見坐寶蓮華時不空見又以定心入此三昧現大神通復令三千大千世界地大震動如摩竭國赤圓銅鉢置平石上傾危不定大地震動亦復如是若有衆生聞此音聲覺悟之者皆得快樂譬如東方不動國土亦如西方安樂世界其中衆生歡娛踊悅時不空見復以清淨恬寂調和柔潤端整至直無曲甚深定心如其相類示無作神通於是三千大千世界滿虛空中兩大猛火無一衆生身心熱惱此諸群生大火觸身覺是相已

快樂無比譬如比丘入火三昧身心欣躍彼亦如是時不空見復以定心現無作神通又令三千大千世界雨天梅檀細末之香香氣氤氳徧滿大千若有衆生鼻斯香者開神適體快樂無極譬如釋迦牟尼如來於昔劫中修菩薩行定光佛所第六受記二剎時獲不思議無生妙樂一念之頃不可計衆亦得如是隨意歡娛爾時阿難在大衆中而作是念佛入靜室是誰神力而現斯變爲餘聲聞目犍連等將非彌勒菩薩越三界菩薩文殊師利菩薩

不空見菩薩爲是修習大乘之人乃能示此  
神變之相爾時阿難問目連言世尊說汝於  
聲聞中神通變化爲最第一今此通變非爾  
爲耶目連荅言長老阿難汝問何緣有是神  
通如此變化非我所爲長老阿難我所能者  
以此三千大千世界內置口中無一衆生生  
覺知想復次阿難我遊梵天發言音響徧聞  
大千如是阿難我在佛前作師子吼能以須  
彌內置口中若經一劫若過一劫阿難我又  
住彼焰天言語音聲此間世界皆悉聞知長

老阿難我能移於天神堂閣置閣浮提而不  
動搖又告阿難我能降伏惡性毒害難陀龍  
王優鉢難陀諸龍王等又能摧靡弊魔波旬  
復次阿難我往東方過三三千還住第三世  
界之中彼有大城號曰寶門凡有六萬億千  
家屬令彼家家皆見我身復能使此諸衆生  
等聞說無常苦空之音復次阿難我實有此  
諸妙神通未曾示現我今處在蓮華之座悉  
見諸方一一方分有阿僧祇無數如來皆名  
釋迦牟尼世尊處處僧坊右脅而卧觀佛刹

土有如是相猶我天眼見千世界若斯相貌  
是誰神通時目捷連即說偈言

善修最勝獲四神足今我神通無與等者  
唯除自然世間之師我今住此閻浮提界  
動彼東方諸佛刹土帝釋宮殿諸姝女等  
覺此震動皆悉驚悚我能含吐諸佛刹土  
大海山川城邑聚落難陀龍王及跋難陀  
如斯族類性甚毒害我之神力悉能摧伏  
我住梵宮言語之音令此世間皆悉聞知  
能住佛前吞須彌山經百千歲乃至曠劫

住焰世界凡有聲響使此刹土莫不聞之  
我往寶城變身普現徧在六萬億千之家  
我於此生未現斯變阿難當知吾今所見  
善哉奇特靈化神通我自見身及諸衆生  
悉共坐此寶蓮華上歷觀十方大威世尊  
我從昔來未見斯瑞不疑如來自然神變  
或是菩薩威神之力

爾時長老目捷連說此神通師子吼時十  
千衆生皆得人身遠塵離垢獲法眼淨爾時  
阿難問舍利弗如來說汝智慧第一今此神

變將不汝耶答言阿難非我爲也我所能者  
二十年中常勤修習毗婆舍那行住坐卧正  
念觀察其心澄寂曾無動亂分別顯說無量  
諸法方便精求不出法界唯有如來乃能究  
盡長老阿難汝頗知不若我以衣置於大地  
目連雖有自在神通盡其勢力不能令動長  
老阿難汝今當知我於佛前作師子吼諸大  
聲聞具六神通三果學士天人魔梵阿脩羅  
神沙門婆羅門一切閻浮外道異學尼犍子  
等來在會中若能自知身無我者我今當以

三摩跋提決定爲之師子吼說大丈夫說不  
思議說唯除世尊一切知見彌勒菩薩一生  
補處住無生忍菩薩摩訶薩海德三昧菩薩  
摩訶薩善建德三昧菩薩摩訶薩諸佛現前  
三昧菩薩摩訶薩大德聲聞今可問我如此  
身者何者是我爲可見耶不可見耶又問異  
學諸外道等汝所計身有神我者爲是過去  
爲當現在長老阿難我如是相種種神通變  
化非一聲聞緣覺所不能知亦不能見何者  
是我所言我者爲住何處聞如是聲長老阿

難吾常精勤修丈夫業亦復恒習知解之行  
 我今更有心自在力我能伏心心不伏我長  
 老阿難吾自見身及以天人坐大蓮華又見  
 諸方在在處處無數難思阿僧祇界覩佛世  
 尊坐道樹下大梵天子請轉法輪吾當隨順  
 聞如是聲我眼悉見諸世界中種種<sup>五</sup>蓋幢  
 旛華鬘如我即時見此忍土長老阿難我心  
 念言為是世尊作此神通大德聲聞之所為  
 乎菩薩往昔曾種善根今獲如斯變化果報  
 時舍利弗即說偈言

如來不思議	如是佛功德	若有善逝眾
神通廣難思	及諸佛弟子	有學無學眾
於此剎土中	我智最第一	唯除諸菩薩
信念深固者	長老阿難陀	我慧無等雙
現在及未來	無能見過者	除世調御尊
及趣菩提人	我恒勤修習	毗婆舍那行
滿足二十年	觀察一切法	精心方便求
未曾得邊際	我所有智慧	不可得稱量
我以智慧力	現在於佛前	能師子吼說
唯除異學人	及行聲聞乘	求我真寶者

若我現神通	飛騰虛空時	此刹無人見
吾之所遊處	聲聞亦不覩	唯除世間雄
獨別兩足尊	及以善逝子	如是諸人等
知我之所在	外道眾邪見	悉非其境界
心常自在轉	禪悅不思議	若有大士業
修習深空行	長老阿難陀	我現此神通
一切聲聞眾	終不能得知	奇哉於今日
悉覩十方佛	我在蓮華座	明見諸刹土
建列不思議	寶幢妙華香	一切世界中
變化不可稱	長老我心念	不疑是世尊

威德善逝眾 種種變化事 或是不空見  
菩薩之所為

是舍利弗師子吼時一萬三千諸眾生等遠  
塵離垢得法眼淨時大迦葉亦在眾中阿難  
心念是大迦葉威德具足神通自在今者變  
化將非是耶於是阿難問迦葉言此之靈奇  
是大德乎迦葉答言斯神化相非我所為吾  
以智力悉能分別顯示一切長老阿難我今  
住於世尊之前作師子吼能以三千大千世  
界其中諸水江河谿壑泉源池沼百千萬億

無量巨海一切水聚吸置口中悉使枯涸令諸水性魚龍之屬都不覺知亦無惱害長老阿難汝今當知我於佛前諸天世人梵魔沙門一切衆中師子正說無畏之言我力能吹須彌山王大轉輪山雪山山王乃至三千大千世界一切諸山皆成微塵依此山者都不覺知長老阿難我能如是得此自在神通之力復次阿難我又能吹三千大千諸世界中一時皆成猛焰熾火譬如劫燒將盡之時一切衆生亦不覺知又無燒害熱惱之者又不

生念燒刹土想我神力相具足如是長老阿難吾住此間天眼遠矚東方世界億百千刹諸佛國土始處處燒終同一火我既見已心生念言今當示現神通變化即如其相以三昧力住此世界過於東方億百千刹能以一氣吹彼猛火甲六悉令俱滅火即滅已從三昧起復更發大炎盛之火長老阿難我神通相及波羅蜜如是滿足若有人天生疑不信世尊今者右脅而卧若從定起汝可往問唯佛如來能知此耳世尊于時於靜室中遙語阿難

大德迦葉說師子吼汝善受持爾時人天阿脩羅等皆共歎言奇哉上座摩訶迦葉師子吼時三億衆生皆得人身遠塵離垢得法眼淨八十五百千那由他諸天亦皆離垢得法眼淨長老不空見菩薩彌勒菩薩文殊師利童子菩薩越三界菩薩如是無量諸菩薩等皆被堅固弘誓之鎧聞大迦葉師子吼說以篋盛華揣如須彌作此變化供養迦葉爰及一切聲聞之衆空中復化作七寶蓋一一聲聞各蔭一蓋爾時長老摩訶迦葉見是寶蓋

語阿難言此衆決定大乘之行作是種種神變之事長老阿難我坐蓮華處處方所見佛世尊不可稱計阿僧祇數復覩諸刹七寶巖淨雜色間錯微妙無極其中衆生更相迎接悉見彼國豐樂之相譬如三十三天之上貪醉華鬘愛著瓔珞諸天身色如月光明於虛空中有化寶蓋一一衆生各蔭一蓋亦如我今等無有異處處佛刹無量菩薩從兜率天降神母胎長老阿難我今所見奇哉達行及師子吼此實非凡之所能爲如是瑞相現大

神通爾時長老摩訶迦葉即於眾中而說偈言

阿難汝當知 我以念定力 現在於佛前

以是三千界 此佛定刹土 一切諸巨海

大小江河等 無量種水聚 我以神通故

悉能吸彼水 置之於口中 雖皆令枯涸

眾生無傷損 不惱於水性 此刹眾須彌

黑山諸山等 我住神奇力 悉能吹散之

我以聰慧智 又用神通化 令此佛刹土

一切成煙焰 眾生不熱惱 亦無畏懼想

我住於此界 見彼東方國 阿僧祇刹土

悉為火所焚 奇哉難思力 令彼火即滅

既見諸神力 如此自在行 令無數佛刹

悉無有毀損 我處蓮華座 見此諸刹土

種種皆端妙 殊傑妙儔匹 又覩兜率天

菩薩降神時 不疑諸善逝 心達自在者

為是諸聲聞 不空見菩薩 為彌勒大士

而有斯瑞相

爾時阿難心生念言是富樓那彌多羅尼子  
說法人中最為第一今在此會有大神德決

定諸法得到彼岸如是神通將非已耶我今當問即便白言唯富樓那如是瑞相大德爲乎荅言非也長老阿難我之神通調伏利益諸衆生故力能示現以手掌摩此之三千大千世界不令衆生有傷損者若有衆生樂神通力示現翻覆大千世界譬如勇健巨力丈夫以指捻取迦利沙槃上下挑擲不以爲難我以右手轉側三千大千世界亦復如是無一衆生有惱害者長老阿難若此三千大千水界我以手指一點取之悉著口中亦無衆

第六

九

生生知覺想我於佛前作此神通長老阿難於夜初分我以清淨勝妙天眼於此三千大千世界歷觀諸方何者衆生於法疑滯當爲除斷即以天眼觀諸方時處處見有四方世界其土廣大無數衆生迷於正法長老阿難我心念言不起此座往彼破疑即如三昧清淨寂定調和柔潤正直之心斷彼衆生於法疑惑我於會中演說法時一一衆生謂在其前長老阿難夜既初分四方各有無數千衆悉得安住於聖法中三萬衆生皆受禁戒六

萬衆生歸依三寶從三昧起我如是相神通  
 變化悉能斷除衆生疑惑長老阿難我能安  
 住於此世界以淨天眼見於北方降怨國界  
 從此佛土過三萬刹有一衆生於法疑惑是  
 世界中佛般涅槃應聲聞法之所化度我心  
 念言當斷其惑不往彼處即於此坐遙令衆  
 生自然調順長老阿難我今即時如定心相  
 入此三昧無數衆生作法光明如是相貌我  
 之聲聞諸波羅蜜皆已滿足若使有人於此  
 衆中脫生疑網不信受者如來起時自可往

問即於是時佛神力故虛空之中出大音聲  
 阿難汝今如是受持如富樓那師子正說時  
 諸人天阿脩羅等皆歎奇哉實為希有聲聞  
 神通相貌如此豈況如來真境界乎時諸人  
 天作此讚已富樓那彌多羅尼子即於衆中  
 而說偈言

第  
六

十

我諸漏已盡	決定到彼岸	永脫一切生
為世所歸依	既入於衆數	異佛神通力
右手能翻覆	天地山河等	不令一衆生
而有傷損者	長老我神通	勢力實如此

若有三千界	大千之水聚	於此佛土中
或見或不見	我能以一指	悉點內口中
不使諸衆生	而有覺知想	我於初夜時
天眼觀諸方	何者衆生等	於法有疑惑
當住神通力	悉爲除斷之	我見一衆生
於法墮疑網	若有淳善心	貪慕求法者
吾不起此座	悉除彼疑惑	四方千億衆
我以淨眼施	能令彼生信	使發佛菩提
時有三萬人	從我受禁戒	六萬諸衆生
歸依於如來	其心得寂靜	安住正法中

我於初夜時	示現妙神通	一念於此坐
歷觀東北方	周觀過千刹	正降怨世界
彼有一衆生	心疑於諸法	我住此佛刹
彼人疑於法	欲令見正路	今決其迷惑
長老我神通	智力實如斯	唯佛能哀愍
一切諸世間	此處人不信	可往問世尊
我今坐蓮華	見彼佛涅槃	處處方刹土
闍維如來身	及見佛殊特	爲是誰神力
又如我所見	諸佛般涅槃	廣遠甚弘雅
不可得思議	爲是佛所作	聲聞之人耶

爾時阿難心生念言此羅睺羅是佛之子有大威德神通自在今亦在此大衆之中如是變化將非已耶阿難即便問羅睺羅汝於戒學得到彼岸此之神通汝所爲乎羅睺羅答言非我所作長老阿難我如是相種種百千威德神力隨意自在爲佛之子或隱或顯未曾憶念不嘗在前亦未示現長老阿難我能够以此三千大千世界之中百億四天下百億日月百億大海百億須彌百億大小轉輪之山如是廣大諸餘山等以四神足置一毛端不

今衆生有傷損者於四天下不相逼迫彼此去來亦無妨礙吾之神通自在如此長老阿難我能以此三千大千一切水界大海江河谿澗池沼以一毛孔嗽置口中源流派別本相分明其中衆生適性不改水之盈竭亦不覺知長老阿難我住此土如定心相入此三昧見東北方難生如來我在此刹白淨王所撮取一把梅檀末香供養彼刹一切諸佛其香芬烈乃至十方難生世尊化作臺觀高十由延七寶所成即在此處燒衆天香復於臺

上化作寶蓋其蓋足高億千由延縱廣正等  
 百千由延彼世界中一切衆生皆共幻作梅  
 檀樓閣其樓上高百千由延縱廣正等五千  
 由延如是無量在寶臺中各各莊嚴不相障  
 礙長老阿難瑞相如是我於聲聞具波羅蜜  
 或有生疑不能信者世尊若起自可往問我  
 師子乳如來證知時羅睺羅即說偈言  
 長老阿難陀 我以大千界 百億四天下  
 及無數佛刹 如是諸刹土 悉入一毛孔  
 我神通如是 無可譬類者 世界甚廣大

第十六

十二

不滿一毛孔 各安去來業 悉不相妨礙  
 我能如是示 神力不虛行 須彌寶山王  
 及大小轉輪 復有諸餘山 皆入一毛孔  
 以我神變力 彼此不相礙 長老我如是  
 示此神奇相 悉見入毛孔 而身不疲倦  
 我又神足力 以此大千界 江河大海水  
 吸內毛孔中 而此佛刹土 一切大水聚  
 當入毛孔時 區別不渾亂 我在善逝前  
 示現於神通 若疑不信者 往問普眼尊  
 我處蓮華座 見十方菩薩 頭目及妻子

施以求菩提 奇哉我所見 實生希有心  
 不疑於世尊 所作之神變 為諸大威德  
 善逝聲聞眾 為是不空見 彌勒菩薩等  
 長老羅睺羅師子吼時八十七億百千那由  
 他諸天人等得法眼淨是諸天等見法到法  
 選擇眾法明了於法如是相類當設供養以  
 天梅檀細末之香以用奉散羅睺羅上奇哉  
 佛子離垢清淨住大乘行深妙之法能演師  
 子殊妙之音善哉羅睺羅未來之世當師子  
 吼猶若今日爾時阿難心生念言此須菩提

阿蘭若行最為第一而無等雙今是大德在  
 此會中世尊常說此須菩提能作種種無量  
 神通阿難即問須菩提言如是變化將非汝  
 耶荅言長老非我所為我能常樂不捨閑處  
 如彼定心入此三昧以是三千大千世界置  
 一毛端極微之分周迴旋轉如陶家輪其中  
 眾生無覺知者長老阿難我於佛前能師子  
 吼正說無畏吾以一氣吹此三千大千世界  
 悉令燒盡不使眾生有熱惱想我曾示現如  
 此神變能在佛前說師子吼以此大千世界

衆生置一指端上昇虛空彼此寂然無諸音聲不相觸礙及覺知者長老阿難我之所能如彼定心入此三昧以清淨眼一時矚對八方上下六萬諸佛一一方中又覩六萬百千世界諸佛如來彼處次第見無前後長老阿難我如定心如其相貌作神通行住此閻浮須彌山頂釋提桓因所居天宮撮取一把梅檀末香俱時徧散十方諸佛紛綸彌漫以用供養我住此刹見彼衆生恭敬尊重讚歎如來彼土衆生悉知我是釋迦如來應正徧知

聲聞之中空閑第一長老阿難我之神通如是相貌究竟彼岸若此人天於我生疑有不信者往問世尊如來自當知此三昧時佛神力於虛空中震大音聲告阿難言如須菩提正說師子無畏之音汝可受持時諸人天梵魔沙門一切閻浮阿脩羅等第六既得法利生希十四有心驚愕毛豎歎言奇哉聲聞神變乃能如此豈況如來種種神力無數三昧真實者哉時須菩提知諸人天已得法利即說偈言  
世間師稱我 阿蘭若最勝 安住禪解脫

現無量神力	長老阿難陀	我能以大地
置於一毛鋒	旋之而不危	亦如陶家輪
雖轉不傾側	又於世尊前	破碎一切地
及以諸山嶽	無有損傷者	我住神足力
威勢皆如此	我能以手掌	舉刹及衆生
安置虛空中	從上次第下	亦無一衆生
驚疑怖畏者	我入三昧時	見彼東方佛
其數有六萬	南方亦復然	我復見西方
六萬世間尊	北方及上下	斯數亦如是
及觀衆樓閣	妙絕無等倫	以少栴檀末

供養諸世尊 我實有若斯 無垢神通行  
 能大師子吼 及諸示現等 不能深信者  
 可往問如來 我無衆生想 亦無無生想  
 無佛無法想 一切無相故

佛說菩薩念佛三昧經卷第二

音釋

恬徒兼切 安靜也 悚息拱切 懼也 吸許及切 呷也 洄曷各切 水竭也  
 矚未欲切 視也 篋篋音詰 盛也 擲徒弔切 投也  
 嗽色角切 吸也 派音卦切 分流也 撮七活切 指撮取也

弔六

十五